

**Lutino weng pwonye (Nywako lok kare-ki-kare)**  
**Dul lok me 1: Wi ngec ikom jami ma weko kwan tek bot lutino**

- **Acaki ne**

**Glades:** Itye ka winyo *Lutino weng pwonye (ma obedo nywako lok kare-ki-kare)*. *Lutino weng pwonye* Jo ma kelo botwu aye **Backup Uganda** kacel ki **Brainstud**. Itwero winyo pwonye wa ni ki i wi yamu me **internet** ma tye iwang **website** wa ma ki lwongo ni [www.backupuganda.org](http://www.backupuganda.org), ka itye ka winyo wa ki Gulu, iromo gamo pwonye man macalo dwon ma ki mako ki iMega FM, onyo iDivine Video & music library matye idye taun kany, ki bene igangi kwan magi, Highland primary gang kwan ma tye iObiya iyo Kitgum, Gulu prison primary gang kwan iyo Lacor ma opime ki ot lega Holy Cross, iGulu town primary gang kwan ma tye iyo Gulu University, onyo iMary immaculate primary gang kwan inge gang lega madit pa Katoli ma ki lwongo ni Cathedral ma tye iFor-God, St Joseph's primary gang kwan onyo Christ the king demonstration primary gang kwan inge gang kwan Sacred Heart.  
Kace imaro ngec ma ipwonye wa ni? bed agonya me nywakone ki lupaco nii, ki luremi, ki jirani ni bene. Ka dano madwong guwinyo pwonye ikom kit peki ma lutino nongo ikwan, ci waromo konyo lutino wa maber loyo!

- **Nyutu acaki pwonye (Nyutu dul lok me 1)**

Wajolo wu ipwonye wa me acel me *Lutino weng pwonye*. Pwonye man neno yo me konyo latin acel acel wek obed ki kony weng ma mite pi kwan mamege- kadi bed ni tito loke iye pol.

- **Nyutu lulok ki dul kama gin gi tiyo iye**

**Glades:** An laloki nyinga Glades, atye lapwony i dul me Backup Uganda. Tin, atye ki lawota Beatrice. Beatrice iromo nyute bene?

**Beatrice:** Apwoyo Glades. An laloki nyinga Beatrice, atiyo i dul me Backup Uganda bene, adoro dul man ma tiyo tic ma pire tek eni ma calo Director.

Eni pwonye wa me acel me *Lutino weng pwonye*, wa bi waci wu wiye wiye awene ma dul eni ocake kwede, tic ma watimo, ki pingo watye katimo pwonye eni.

Ingeye wabi cito ka neno gin ma wamaro lok iye tutwal, peki ma yelo lutino wa ikwan gi. Wabi bedo ki kare me tito kore ki kore peki ni ki acel acel ento kong wa bi kwanyo kare me gonyo tyen lok magi; '*tek pa kwan*', '*ngolo ma diyo kwan*', '*miti ma myero pi ngolo ma diyo kwan*', *ki mukene ma pol ataa.*, mapwod pe yaa wa loko ikum peki ma yelo lutino wa ikwan gi, ngo ma kelo peki magi ki yoo ma watwero konyo gi kwede. Kong dong wacaki!

**Glades:** Dul me Backup Uganda tye dul ma pe jenge ikom gamente ma tiyo ilobo Uganda ma ocako tic I Uganda cake mwaka 2016.

Wacako project wa me acel iGulu, kama pwod watye iye wa i cawani. Ka ni atit ma cek, wa miyo kony bot lutino ma tye ki peki ikwan.

watye ki niyee ni *Lutino weng pwonye* ki bene latin acel acel omyero kimine kare me kwan.

Ento bene pe wayee ni latin acel acel romo kwan ki kero ma rom onyo iyoo marom ki lutino mukene ni weng.

Latin acel acel tye ki mic (ma pat pat), kit , kero, ki dic ma mege. Idul wa ma calo Backup Uganda, pe waneno peki ni calo peki pa lutino ken gi, watamo olungtuke, wa tamu ni patpat pa lutino nyutu ni wan weng dano adana, ma pe poko mwaka.

Ka wamito lutino wa weng gubed ki kare me oo wa ilek mamegi, omyero wa yee ni gin mito jami ma pati-pati wek gu oo kama gi mito ni. Tere tye ni kit latin acel acel tye ki dic mamege kene ikwan ma omyero ki nen ni ki konyo. Watye ki niyee ni yoo me konyo latin acel acel, tye calo miyo pwonye pi lutino weng. Pwonye eni cito anyim kun kato keto lutino ma tye ki kero ma pat pat igang kwan acel onyo ot kwan acel. Tyen lok eni aye gin ma wa bi loko mapole iye idul lok ma tye ka bino.

- **Gin ma dul Backup Uganda timo (tit kor tic pa Backup Uganda)**

**Beatrice:** Ma calo dul me Backup Uganda, wa tiyo kacel ki gangi kwan, PTCs ma miyo pwony ki jo ma mito bedo Lupwonye me gangi kwan me Primary ki bene dul mukene ma tamgi, miti gi ki tic gi rwate ki megwa leb munu boro gi abora ni *Partner Organisations*.

Pwod dong watye ka tic ki gangi kwan ki PTC ma weng nonge iGulu, ento bene pwod watye ka dongo, bene watye ki gen ni yub wa ni obi nyaa in gangi kwan ma pati-pati ki distrik mukene.

Igangi kwan ma watye iye ni, wabedo ki kare me miyo kony me teno kor yub ma igangi kwan- ego ni bot lutino ma tye ki dic iyo me kwan. Bene wa mito ni kit lapwony acel acel obed ki kare me niang ikum lanyut mo keken ikum lutino wa iot kwan, wek gubed ki yo me konyo gi. Pol kare, tere ni dok omyero gin oyub odoco but pwony mamagi nyo medo cawa mukene me konyo lutino ni. Kit me konyo lutino mukene mapat ki bedo iot kwan, manongo pwony pwod tye ka mede onyo inge pwony, watamo ni jami atima ki iot kwan aye myero ki yung onyo kipok kine pi lutino ma pat pat, wek lutino wa pe gubed keken gi. Me weku lupwonye timu jami ni, wamiyo pwony bot gi pi mwaka acel ki igangi kwan gi. Bene wa konyo gi ikum pwony ma gunongo ki botwa, pol kare wa cito iot kwan gi kama gin tye ka pwony iyee ci bene ingeye wabedo kacel ci wa leyo tam ikin wa ikom gin ma owoto maber, ka ma obedo matek ki kit ma waromo yube maber pi anyim.

Wan wa mito bene ni lapwony acel acel obed ki kare me nongo kony me pwonye ka pe tye ki ngec iyo magi ma en twero konyo kwede latin kwan maber loyo, wayubu ludite ma doru gangi kwan me konyo lupwonye gi, labole aye yubu gin ma walwongo ni yub me konyo kor pi latin kwan acel acel bot lutino ma mito kony ni.

Bene wateme ki tek wa me neno ni gangi kwan tye ki dul committee wek gumede ki yub wa ni igangi kwan gi kede dong wapeke igangi kwan eno ni, wek kadi wa peke igangi kwan eno ni, committee me gangi kwan romo mede ki konyo lutino weng ma nongo teka niang jami kwan.

Jami ni weng pe romo time labongo lunyodo pa lutino, wa lwongo lunyodo ikacoke I gangi kwan, eni weng time ka gangi kwan wu omiyo it wa twero.

Luwiny wa mukene ma tye ka winyo wa tin, romo bedi bene ibedo ikacoke wa igangi kwan ma watiyo iye ni, ento bene ka pwodi, I pwonye eni ibi bedo ki kare me nongo ngec pien waleyo tam ikin wa. Luyodo magi bino ikacoke wa ni pol kare gi waci wa kit ma gibedo kwede ki lutino gi ki i gang, wan bene ma calo dul me Backup Uganda, wa waci gi bene kit ma gin gi romo kwede ngeyo ka lutino gi tye ka nongo dic itimo jami me kwan ki bene kit ma gi twero konyo kwede lutino gi ma tye ki peki ma yelo kwan, ki bene nga ma gi romo ceto bore ka gi mito konyo.

Pe wa tiyo ki lupwonye ma orii ipwony keken, ento bene wa konyo wa jo ma obidonyo ipwony iyi anyim bene. Kun wakato ki iribbe wa kacel ki gangi kwan ma pwonyo jo ma tye ka kwan me doko lupwonye me Primary, wa miyo pwony ma rom ki lutino ma gitye ka kwan me bedo lupwonye ka iporo ki jo ma dong tye lupwonye i gangi kwan ma wa tiyo iye.

Ki bene me weko pwonye wani pe ogik kany, wa pwonyo lupwonye madongo ma ki lwongi ni tutors ma gipwonyo I PTC bene, wek lupwonye ma dong tye ka bino ni gubed ki kare me konyo lutino kwan weng ki peko gi ma patpat. Tic wa weng time ki ribe kacel ki ngec dok cwak pa gamente ma doro lok kum pwonye I distrik ki wilobo Uganda weng, watiyo kwedgi kacel.

watye ki gen ni dul ma doro lok kum pwonye ilobo Uganda gitye ki jo ma dwong ma gitye ki mic ma patpat i dog tic gi mabene guketo lutino icwinygi.

En muweko pwonye wa weng tye me konyo gin ma tye idog tic macalo lupwonye, me kaka tic ki lutino atir atir.

Wangeyo ni wan ma calo dul me Backup Uganda pe watwero timo jami ni weng ken wa, en ma oweko wa maro tic ki dul mukene ma miti gitye ma rom ki megwa. Pol karedule ma tiyo ilok kum pwonye, magi mito ni kit latin acel acel ilobo ni obed ki kwan maber dok ma myero. Ikin dul ma watiyo kwedgi aye tye *Geneva Global* ki *Joy of Community Foundation*.

- **Nyutu pwonye wa**

**Glades:** Kit ma waromo wacu ne kwede, wa maro nywaku tam ki dano weng ma gi neno lok ikom kwan pa lutino. watye ki niye ni ka dano acel acel obedo ki ngec ikom peki ma yelo lutino ikwan, yoo ma giromo konyo gi kwede, wa bineno alokaloka ma dit I kwo pa lutino kwan wa ki kabedo wa weng ikin paci. Me weko jami ni otime, wa yubu pwony ma tye idwon amaka ma ki lwong ni kila latin acel acel romo kwan. Pwony a bicel ki eni bene, wa bi waci wu maditte i kum peki ma lutino wa no i kwan gi. Pwonye wa ni nonge i wi yamu ki bene iromo nongo ne ki iMega fm, Divine Video & music library, ki bene in skul magi, Highland primary gangi kwan, Gulu prison primary gangi kwan, Gulu town primary gangi kwan, Mary immaculate primary gangi kwan, St Joseph's primary gangi kwan unyo crist the king demonstration primary gangi kwan. Bed agonya me winyo pwonye eni ki jirani ni, luremi ki wadi ni ma patpat, unyo bene iromo winyo ne karacel, no pe ugure karacel pi two corona eni. Pi two corona eni, pe dong wa twero ka bedo ki

gure ma dit, ento bene pe dong omyero wu geng wa i pwonye ikum yoo ango ma wa romo konyo kwede lutino in yo me kwan.

- **Niang ikum peki me kwan ni**

**Beatrice:** Icawa ni, dong wa cit ikum lok. Wan eni weng wa winyo lok madwong ikum lutino ma gi nen mapat ki ikum luwodigi, lutino ma gi waci kum gi yot ni, pi tyen lok ma pol. Wan eni weng wa niang ikum lok me goro onyo ngolo, jo mukene gi waci ni giniang mot, gi dwong ata. Kong wa tee kare me niang jami eni

Kong dong wa cak ki miti ma pire tek.

kong dong wa cak ki niang te lok pa miti ma pire tek. kama lok eni aa ki iye pe tek. Ma calo dano, wan weng watye ki jami ma wa mito, ma pole wa riba ariba, watye kwede weng. Ento bene pi jami madwong, wan jo mukene watye ki jami ma wa mito ma pat ki dano weng. En ma oweko wa lwongo ni gin ma pire tek dok pat pate tye, tere tye ni jami ne pe rom ki pa jo mukene. wa romo laro lok ni jami ma mite ni keken pire pe tek onyo pe pat dok tutwal, ento gin me wamito ki dano ma pat pat en aye pire tek. Labole tye ni kare mogo ikwo wa wan weng wamito kwan. Pol wan, ka dong wa timo jami ma mite, calo culu cul me gangi kwan ki jami mukene, tere ni wa woto ci donyo iot kwan. Wan jo mukene wot pe obedo gin me wa twero, labole tye ni, tyen wa pe romo wot. Wan weng wa mito kwan calo jo mukene, ento wa mito gimoo madok kato joo mukene nii me wek wa oo kama wa mito ni. Eni obedo ginmo ma mito atama; watye ka lok i kum miti ma pire tek, miti pa dano, onyo bene wa twero pa dano, wiwa opoo ni iromo bedo ki miti ma pire tek, ento pe iromo bedo miti ma pire tek. A winyo dano waci ni, latin eni tye miti ma pire tek mukene dum aduma ni *special needs child*.

Ka bedo ki *miti ma pire tek* tere tye ni ngat mo mito jami ma pat ki jo mukene, ci iromo ka byeko ngo ma teka ki waci ni itye ki *miti me kwan ma pire tek*; mito kony ma pat ki jo mukene, tutwale ikwan. Dong niange ku? Kombedi, kong dong wa weki obed ma nwang ma nok; Pat pate tye kwene ki ikin *miti ma pire tek me kwan ki peki ikwan*?

Apoka poka ikum jami aryo ni weng tye ikwan tutwale. Labole tye ni ka atiyo ki lela ma lugoro tiyo kwede ni me wot, ento ot me kwan ma mega pe tye ki ka ma lela na romo yito me donyo, tere tye ni doko teko me donyo iot kwan. Eni aye ki waci ni a tye ki *miti kwan mapat*. Ka adonyo iot kwan, donyo na ki lela iot kwan balo kit ma lapwony pwonya kwede? Pe mite kumeno. Ento mere, tye peko ikwan ma balo kwan na, labole lube ki bedo na iot kwan ki niang jami ma lapwony tye ka pwonyo ne. Eni balo kwan na, Pe tutwale calo kwan ki cura. Egoni aye ki lwongo ni peki ikwan

Kombedi kong dong wa kal tyen acel, ka wa waci *peki ma diyo kwan kono*? peki ni dwong, ento pe gin weng ki lwongo gi ni *peki ikwan*. Ento mere, wa maro ka waco ni peki ni weng rom aroma ki *peki ikwan*, ento gin weng pe tye *peki kwan*. Tye goro ma diyo kit me kwana kikome. Labole tye ni, tye peko mo ma yelo lutino wa i kwan ma ki lwongo ileb munu ni *dyslexia*, ma obedo leb ma

Dactari tiyo kwede me lwongo kit ma latin kwan ma nongo teka kwano onyo gonyo nyig lok, nukuta ki alama ma ki coyo ento myero wiwa opo bene ni eni pe yelo onyo nyutu ryeko me anywali onyo me wic pa en latin eni.

Me dolo doge, bedo ki *miti ma pat* tere tye ni jami ma mite pat ki jami ma jo mukene mito; bedo ki *miti kwan ma pat* tere tye ni, itye ki jami ma mite ma pat ki jo mukene, makeme ki kwan; peko ma yelo lutino igang kwan, tye peko ma yelo kwan atir atir ki goro ikwan tye goro ma yelo lutino i kwam kikume.

Ma pwod peya Glades otero wa ilabole me peki ikwan ki goro, Amito lok ikum lok ma pol kare pe konyo lutino wa ka ki ni lwongo gi kumeno, amiti wa lok ikum kit ma ki lwongo kwede lutino wa ni icawa mukene. Ki i Backup Uganda, wa maro ka lwongo gi ni *lok ma pe omyero ki wac*, pien pe wa tamu ni medo gimo keken bot lutino wa ma gitye ka teme ki tek gi me kwan igangi kwan ma pe tamo pi gi. Iromo byeko kodi lok ma a tye kawaco ne ni, Glades?

**Glades:** Aromo tamo ne. Awinyo lupwonye ma dwong ki lunyodo ka lwong lutino gi ni lababa, laming, tutwale ka gupoto peny ki igang kwan.

**Beatrice:** Kikume! ki bene ka awaci kume wac kodong? Onyo lamir. Lok ada me aye ni, pe wa romo waco itwu ngo ma omyero otii kwede ki ngo ma omyero pe otii kwede. Ento, atamo ni wa romo weko kong wutamo matut nino ma lacen me tic ki lok magi, ka wu tye ka lwongo latin ki yo kwan ne. unyoo latini ni tye ka nongo peko ma pe niango in iye? Wutamo ni lwongo gi ki nying ma pe opore ni obi konyo gi? pi ngo pe itam me niang ikum ngo ma tye ka yelo gi wek in ikony gi? Wa bed kwede i wii wa ni lutino eni ma gi tye ki peko ikwan ni gi niang mot pol pa kare gi tiyo tyen apar ma loyo joo mukene ni me nongo nucu adwogi ma pol pa jo mukene gi nongo. Ma ka ikum lok, lutino eni omyero ki kony gi ma kato lutino mukene ki cuku cwiny gi. Ka wa mede ki pwonye ni, Glades obi teru wa i peki ni ma tutwale dwong i kin wa ki lutino wa ki bene miyo ngec ma nok ikum peki ikwan ni. Eni wiye wiye, wa bi nywako matute ipwonye ma tye ka bino.

- **Dong wa bi nywako matute ikum kwayi peki magi ma pat pat ma ikwan ni**

**Glades:** Tin, abi cito ka lok ikum peki abic ma pat pat ma kwako kwan ki goro onyo ngolo.

- Me acel en aye *dyslexia*, ma obedo peko ikwano coc.
- Me aryo aye *discalculia* ma obedo goro ma diyo timo cura,
- Me adek aye *ADHD* ki *ADD* ma obedo goro ma weko keto cwiny tek.
- Me angwen aye peki madok ilok kom dingo;
- Me abic aye ma ki lwongo ni *Autism* ma eni goro ma bino iyo me dongo dok nyute irwom mapat pat iyo me nongo tek me bedo ki lok ki jo ma ingeti ki yenge ma nwone tere tere ki bene kit tim onyo tam ma bene time tere tere.

Wa cak ki *dyslexia*; ileb munu ka ipoko kine, nukuta ne me acaki me 'dys' tere ni 'tek' ileb mukene ki bute mudongi 'lexia' ma tere aa ki i'kwan ma obedo peko ikwano coc ma weko latin kwan nongo niang onyo tito tyen lok tek ki nyig lok.. Pol kare tye pien gi yele ki kubu lok kita winye kwede ki kita omyero ki coo kwede. Adwogi ne, ineno tek tek ke ikwan, coc ki coyo jami. Labole, dano ma tye ki peko ni gitye ki peko ikwano jami ma tek, ma pol kare yelo gi ikit me dongo kit ma myero gulok kwede. Pire tek ni dano myero gubed ki ngec ni pe dano weng matye ki lanyut eni ki tye ki peko ni, ento ka lanyut omede ki nyute, ci kwed ka kato me moko bedo tye pa peko man

Me aryo ne tye *dyscalculia*. peko i cura. peko eni tutwale mako lutino ma gitye ki peko i cura. lutino ma gitye ki peko eni pol kare jami ma nama tye iye niange tek ki bene a poka poka i lanyut i cura calo lamed, lapok, lanyaa ki lakwany, labole calo latin ma tye ki peko ikwan, mite ni wa bed ki ngec ni pe gin weng gi tye ki peko icura, lube ki ngo ma okelo peko ni ki bene ocake awene. Mukene mite ni ki lub kit kwan pa latin acel acel ki bene ka bedo iot kwan ma nongo lapwony tye ka pwony.

Wamede anyim, *ADHD/ADD*, peko ikit me keto cwiny i jami . Tutwale lanyute maro nen cawa weng ikit me keto cwinye i jami - calo wil wic ki bene tami bedo kamukene cawa mo keken - ki bene mit kom ma tek kato woko, ma tere tye ni latin kwan bedo ma kome mit kato i cawa ma popore, calo cawa me pwony. Ilutino ma gi tye ki peko eni ADHD, in ineno lanyuti weng ento bot lutino ma gitye ki ADD, *hyperactivity* onyo mit kom pe tye, pole latin pe keto cwinye i jami. Gin weng ADHD/ADD, keto cwiny ijami ikin lutino peke onyo aa oo i yot. Kong dong wa nen labole: iot kwan, tam pa latin obi bedo ikum gin acel acel ma tye ka time ki bene ngo ma luwodgi tye ka timo ne. Ibineno latin ni pe romo bedo kara cel mot ento obi bedo ka lubu kama woo tye ka aa ki iyee, ma pol kare balo kwan gi. cawa mukene bene gi timo jami labongo tam, ma romo kelo it gi peko. Lutino ma gitye ki mit kom ma tek kato woko bene gi loko tutwal, pe gi bedo kara cel bene. Ento omyero wa bed ki ngec bene ni lutino mukene gi tye mere luyela ma bene cawa mo keken kit gi romo yube, pe tere ni gi tye ki peki ni.

Ki bene, watye ki ma wa lwongo ni peko ma lube ki kit- eni tye i kine peki madwong i kit ma lutino kwo kwede; peko eni nen cawa weng latin nyutu kit ma pe opore i kama kwan time iyee. Wa waci eni tye peko me kit ka latin tiko nyutu kit kwo eno ni cawa weng, bene pe dong tere ni ka latin tye layela kare mukene tye ki peki ni, omyero obed cawa weng. Labole romo bene latin ma la kolo ma bene pe paro kit ma adwogi ni tye bot luwotgi, pe bene gikwayo kica pi gin ma gutimo. Kit ma naka nen awaco ni, eni dolo peki madwong, peki mukene tye madwong ma romo bedo ma rom ki magi. Kadi lutino ma gi tye ki peko iketo cwiny gi jami (ADHD) bene gi romo nyutu lanyut ma rom, labole. Wa kelo gin weng karacel, pien kit me konyo gi romo bedo ma rom.

Me a giki ne, wa mito lok i kum peki ikit me bedo, - eni peko ma tye i kit ma wabedo kwede ki kit ma wa loko kwede ki luwot wa. Pol kare ka wa loko ki lunyodo onyo lupwonye pa lutino matye ki

peki ni, gi waco jami ma rom. lutino ni maro bedo ken gi. Kadi mere eni lanyut mapol dano ma tye ki peki ni nyutu, pe lutino weng ma gitye ki peki ni nyutu lanyut ma rom ma weko pole waco ne bedo tek ka latin tye kwede onyo peke kwede. Kadi mere pole nyutu lanyut me bedo ken gi ci bedo labongo lok. Peko mere romo bedo tye ikit me pwoyo kit ma omyero gin obed kwede ki luwotgi ma rom ki jo mukene iyo ma rom bene, onyo calo lutino mukene. Tim ki kwo gipol kare pe loko ki bene lok pol kare tye ayela it gi. Ngo ma kelo peki ni pwod ki tye ka yenyo ne, ento bene wa ngeyo ni tutwale peki ni romo aa ki iyi adam ma megwa. Doki, ki peki ma awaco mukene ni, latin romo nyutu lanyut me two eni - calo lwooro neno dano iwang gi, onyo caku lok, ento bene pe dong tere ni latin eni tye ki peki ni. Jami ma dwong romo weko latin nyutu lanyut eno ni onyo time kumeno. Pol kare omyero wa nen kine, onyo kite bot daktari ma loyo lok ikum two eno ni, ma calo ludiwo ma neno kit me kwan. calo lunyodo onyo lupwonye omyero pe gin ayee gi owac ni latin tye ki malaria, labole - watye ki daktari ma neno lok kom two eno ni - pe gin ayee gi pimo peko ma lube ki kwan.

- **Ngoo ma kelo peki ikwan ni.**

**Beatrice:** Tye jami ma pol ma kelo peki ni, ento bene pwod gitye ka kwedo ngo ki kome ma tye ka kelo peki ni - peko ma tye ikit ma wabedo kwede ki kit me wa loko kwede ki luwot wa, labole, kit ma Glades owaco kwede. Jami ma kelo peki ni tutwale: gimo keken ma kelo peko i adam pa latin, romo bedo ma pwod peya ki nywalo onyo bene ma latin pwod tidi, ki bene lubu ngo ma en lako ki bot lunyodo ne ki kit ma adam ma megwi tiyo kwede; mukene tye jami ma time ma nongo lunyodo wa tye ki ic, onyo ma dong latin ki nywalo, calo two onyo awano ma balo dongo pa adam pa latin. Jami ni weng romo kelo peki ni. Kong dong wate gin ma kelo peko ikwan tye labole: eni bene romo bedo peko ma tye idog gang, ma nyutu ni lunyodo, ki bene dayo gi romo bedo ki peki ni.

- **Yoo ango me waromo konyo kwede lutino wa ki gang**

Iyi pwonye wa matye ka bino ni, wa bi loko matute ikom yoo ango ma wutwero konyo kwede lutino wu ma tye ki peki ma waloko iye ni. Icawa ni wa cak ki penyol lutino wa ki acel acel peki ango ma gitye kwede, ngo ma yelo gi ki igang kwan. Lok kwedgi mot labongo ngolo kop, wek iniang gi maber. Iromo cwalo it wa gin ma latini owaco i nama cim 0772 63 00 78.

- **Agiki ne.**

Wapwoyo winyo pwonye wa me acel ma obedo ikum latin acel acel romo pwonye, kama wa teme ki tek wa me konyo wu me niang peko ma pat pat ikwan ki yo ango me konyo gi maber. watamu ni ibed ka winyo wa wek inong ngec ikom peki ni ki acel acel. Ipwonye ma tye ka bino ni wa bi loko ikom peki me kwan ki coc wa lego ni pe ikeng winyo ne. wa nen.

- **Me dolo ne**

**Glades:** wapwoyo winyo *latino weng pwonye*. Iromo nywaku tami kwed wa!

Iromo ribe kwed wa i facebook onyo iromo cwalo lapeny i nama cim man 0772630078. Imito ngeyo matut ikom dul me Backup Uganda, wek ibed ki ngec in kum jami ma time? iromo nongo



**Gulu, Uganda / Zwolle, The Netherlands**

**E-mail:** [info@backupuganda.org](mailto:info@backupuganda.org)

**Web:** [www.backupuganda.org](http://www.backupuganda.org)

**Tel: UG** +256 7 72630078

**NL** +31 38 4604615

---

wa i website wa [www.backupuganda.org](http://www.backupuganda.org) onyo iromo nongo wa bene i facebook, instagram, twitter ki bene i LinkedIn.

Kong kumeno